

四庫全書

集部

欽定四庫全書

集部
蘇魏公文集卷五十三
四

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣盧邈

謄錄監生臣施華

欽定四庫全書

蘇魏公文集卷五十三

宋 蘇頌 撰

碑銘

資政殿學士通議大夫孫公神道碑銘

有宋四朝耆德之臣資政殿學士通議大夫兼侍讀提
舉中太一宮兼集禧觀公事柱國樂安郡開國侯食邑
一千六百戶食實封三百戶贈銀青光祿大夫謚康簡

孫公墓在汝州襄城縣永安鄉某里孫氏世為趙郡人
自公之曾祖贈工部侍郎諱澄而上皆居平棘死則葬
其邑祖給事中集賢院學士判西京留守御史臺贈工
部尚書諱冲以官終洛陽因葬襄城父贈銀青光祿大
夫諱旦徙占潁昌府長社縣子孫遂為許人公以元祐
二年正月壬午薨於京師嗣子承事郎愔護喪南歸卜
其年五月庚申祔於祖塋之次越四年春愔袖公履歷
功狀泣訴於某曰愔罪逆未殞已畢祥除而終鮮兄弟

獨任宗事行當去遠墳墓重惟先人之大行大節則有
今右丞相高平公所撰德銘存焉然而石納幽堂人莫
得見謹案禮令官終三品立碑墓下今龜螭具矣敢緣
平日之雅請文揭於神道使得終事死無憾矣某辱與
公游且三十年昔官同省後位同列出入趣舍亦多同
者紀述遺德可無言乎公諱永字曼叔生十年而失所
怙大父愛育置之子行再奏守將作監主簿慶厯二年
服祖重畢自列於朝正其三代而官之詔換試銜六年

擢進士第補汝州襄城縣尉所部列薦遷襄州宜城縣
令考課改著作佐郎轉秘書丞太常博士歷知蔡州確
山縣公吏事明達民情隱伏方俗嫩惡靡不究其纖悉
一有教告則民信而服在襄城修保伍相司之法而宿
奸僑寇為之屏遠在宜城復長渠灌溉之利前後太守
為之表章用水多寡之節刊為定令至今不改在確山
立兩稅輸納之限不煩督責而編戶相戒應期自集嘉
祐二年御史中丞賈公薦公文申御史詔且下矣以母

錢塘郡太夫人錢氏高年不當任言責力辭不拜未幾
三司奏選為京東西淮南三路寬恤民力公所至詢民
疾苦得其弊在鄉戶吏主持物務及漕運緩急輕重不
均致有亡家破產之患因考輯衆論斟酌裁定著為成
法上之朝廷頒行諸路皆以為便韓康公帥環慶表公
管勾機宜文字英宗即位遷尚書屯田員外郎轉都官
府罷於審官格當注遠官亦以母故求任筦庫時大司
徒韓忠獻公當國擢公提舉河北糴便糧草踰年召為

權發遣三司開拆司公事治平三年諸王出閣建府選公為侍讀神宗初潛好學不倦一日出新錄韓非子屬府僚讎校公進白曰韓非險薄刻覈背六經帝王之旨顧勿留意神宗曰錄此聊以備藏書之數非所好也明年升儲以公為司封員外郎太子舍人神宗即位拜工部郎中充天章閣待制主管三班院案條束吏躬操簿籍凡有員闕取選者績效高下到選先後預銓次之至集注日依名唱授無復爭訟出為陝西體量安撫使時

諸路旱歉使者四出轉粟以哺流殍公會所在倉庾軍食之餘悉以振贍故民賴以全活者為多值有中旨捕送叛人景詢族屬入西界者不以赦原公言陛下新即位首布大號惡逆者猶蠲除之緣坐者反不宥非所以考春秋謹始之義而取信於天下也歷河北陝西都轉運使是時以邊用不足解鹽市馬別為一司外臺不得干預公奏曰鹽馬國之大計使者端其柄既無統隸苟為非法孰從而制之耶熙寧元年秋遷龍圖閣直學士

充秦鳳路經略安撫使知秦州時有布衣上書言邊事稱旨擢為判司書寫秦鳳路經略司機宜文字執政亦以書抵公言其才至府首談恢復熙河之畫公謂之曰邊陲方靜若無故搔動恐變生不測非敢聞命也遂密疏其非便既而青唐族兵壓邊境謂漢人將錮我青紅鹽之利公遣副帥劉昌祚馳往喻以無是事酋豪聽命而去會新建劉構堡失守有勸公曰此帥事也戮其偏裨可以塞責公曰居敵必爭之地孤軍絕援兵法所謂

不得而守者也尤人以全已豈將帥所為乎緣此斥去
吾之幸也後竟從坐降授天章閣待制知和州三年四
月以提舉詳定熙寧編勅兼知審官東院召還又命為
契丹國信使屬執政建議復肉刑事下編勅所公辭日
面奏曰刻人肌膚深害仁政漢文有所不忍陛下乃欲
行之何也上曰事固未決需卿北歸乃定後竟不果行
尋復學士出為高陽關路安撫使兼知瀛州河決貝丘
瀛冀諸郡尤被其害民戶賦租前以災傷已嘗倚閣而

州縣拘常平法坐視流離科催如故公累章論曰臣言
與法盭用事者所不便非出獨斷則一路之民流亡無
日矣特詔從其請仍命發廩粟以助救卹白溝界河常
患北人絕河捕魚巡檢趙用擅引兵北渡焚蕩其族帳
故致數侵略境上邊郡為之震恐上聞至遣中使密訪
虛實公奏南北信好無間隙但緣趙用侵暴生疑正用
罪則無事矣執政繼以書問息耗公答敢以一門保無
他後北人軍連珠等寨亘四十里謀起舟師邀邊臣會

議公立遣使諭以邊吏冒禁已繫獄矣隣邦何至輕動
耶答曰若罪人已治能以糒醪犒師立自歸矣公命霸
州遺而遣之用本沿邊安撫司所辟公慮其銜前隙復
致生事遂便宜易置皆中機會有旨並塞城寨官雖非
所舉亦聽自辟六年加樞密直學士權知開封府畿內
新行保甲訓練之令緣案教所須多出編戶有訴貧不
能辦者它官司皆拒不納至公受而言之稍懲其弊七
年春降授龍圖閣直學士提舉中太一宮兼集禧觀公

事再以親疾求補外出知潁州又丐閒局以便晨昏改判北京留司御史臺八年冬復舊職遭母喪去位元豐元年服除判軍器監有司患皮角不足以給造作奏重隱匿不輸之科亡賴輩因此搜剔告訐至及婦女首飾者公為之請應私有皮角使人得鬻於官中度者善價售之不堪者任其貨易自是材用足而告訐者息矣冬十一月拜河東路經畧安撫使知太原府公三為邊帥務以安靜為治常飭守吏謹約束毋得妄起事要功以

連禍敗故二境帖然戎漢未嘗有相侵犯者時謂公寬
以得士心信以懷異俗真治世之良帥也三年秋以判
將作監召明堂禮畢特拜太中大夫充端明殿學士病
不任朝請得提舉嵩山崇福宮踰年起知陳州蔡渠水
溢將冒城郭居民驚擾遷徙避溺者不可遏公躬自臨
視先嚴禁盜之令訖水退復故安居如昔雖七筓亦無
失者在郡興葺學舍督教官躬課試之程於是禮教行
於鄉黨矣京西初行保馬監司趣其期冀速賞格公諭

民詔限本寬不必預蓄密奏監司違法病民之弊有旨
詰責使如前詔七年移知潁昌府八年覃需遷通議大
夫永裕陵役兵數萬轉運使請雇民舟車運許汝諸州
常平粟輸陵下州各數十萬斛公言方佃作時調人牛
數萬不能無妨農之害疏入而獲免今上初即位太皇
太后臨朝共政詔求直言時政之闕公首陳保馬保甲
免役錢三事最蔽願一切罷之籍見馬隸軍復監牧如
舊募保伍之材勇者為兵行前朝差科之政今上皆嘉

納之冬十二月詔除工部尚書兼詳定役法今左僕射
呂公右僕射范公大資政韓公實並命也一日召對簾
前面諭以雇役大率上戶太優下戶不易所以專委卿
等詳定是時故相司馬溫公首議變法命官雜論其所
宜未就而溫公薨或有異議欲用輸錢雇役公力陳不
可狀及法成多合所議元祐元年三月遷吏部選法擬
舊以功過及薦者多寡為差公曰以薦者差其高下是
教人奔競以干薦也乃定選闕惟無過有薦者不限多

寡以到選為差次人皆便之未幾以痼疾辭位封章連
上明年正月進資政殿學士兼侍讀罷選事提舉中太
一宮未及拜命以不起聞制贈銀青光祿大夫公為人
外和內勁出於天資其論議平易施設務循故常不求
詭異之迹事或悖於義雖逼以山岳之勢亦不為屈然
亦未嘗矯抗形於言色故入領臺閣出典州郡職事所
及知無不言言無不盡其要領前後有論數十事其尤
著者初歸自歷陽陞見日上問近執政建青苗助役之

法將以紓民以為便否對曰法誠善矣然強民出息輸錢代徭不能無重斂之患若用以資經費非臣所知也初禁倉庾吏受賕滿百金則配隸為軍京司府史有犯亦如之謂之倉法有司奉行極於峻密上常問公曰倉法之行吏尚為姦乎對曰強盜罪死犯者猶衆況配隸乎上曰若爾將縱之乎對曰人但畏法而不能革其心雖府吏臣亦不敢必其無犯它日有敗露是臣今日面欺也赴并門日上詢方今時務所切公言軍器監造作

倍常外議以為將有事於征討夫兵非輕用之物魯衆仲有弗戢自焚之戒漢魏相有兵應者勝之論安危禍福之機不可不慎也上曰兵備不虞若寇戎無警朝廷豈有輕動之理卿言是也公之開陳世務切廟上意多此類也熙寧中言利者欲使都城市行輸錢以免直初下開封詢究便否掾曹議無不便公亦循例書其紙尾後躬訪民間多言不便詔公與今大資政韓公同體問利害無何韓公出守河陽公獨任其責時方行市易抵

當法貸民錢以期限輸息下戶有取貸及期不能償而
自裁者上頗知之一日遣中使密問姓名而提舉者懼
先罷免月出錢萬緡矣它日公復對言市行之筭下逮
錐刀之末有變其名號以昧上耳用事者知之劾奏公
前書府議無不便今乃異論言不以實意在沮撓新法
用是罷府河東以監牧廢地招置弓箭手養官馬習戎
事公言應募者皆流移僑寄旣非武斷鄉曲之人又無
愛戀閭里之意不若罷之以養正兵便忻代二州產鹽

苦惡不可食轉運使司既立監臨增虧之格又重盜販透漏之科巡檢兵吏由是得罪者甚多公奏鹽民食也不可禁兵武備也不可闕今以惡鹽累防兵非所以固圉也是數者皆當時所甚患而言事者畏縮不以聞公極陳其本原深悟上聽先帝以公東宮僚舊待遇特厚凡有所陳皆加意復熟雖或行或格而察公悃悞無它益以信任初病不任朝親遣上醫調診六命近侍問安否且宣諭云欲與卿議邊事何日可出尚虛樞密員以

待公辭不能興懇請道宮以就頤養又遣樞密副使孫公臨問所以欲去之意公具言其狀上皆從之前歲疾再作太皇太后命內侍賜御膳視所苦旣罷天官錫服升班皆如尚書及薨特遣內貴人存拊其孤賻以銀絹各一千又命中使護喪歸潁昌府并勅潁昌汝州共辦葬事其恩禮始終近世未有也公自少敏於文詞嘗從諸生肄業西京國子監公私試常在第一尚書公謂之曰洛陽英俊所集爾年少不宜多上人因不復令與諸

生員校試自爾每有制作衆皆傳誦學問之餘游思書畫特妙行草喜晉唐諸賢帖臨習逼真當時士大夫得其尺牘藏去以為珍玩碑誌不得公筆子孫以為不足有集三十卷藏於家初忠獻公之知公也因得其詩稿讀之歎愛稱譽不已一日相見慰籍如平生謂之曰公貴人也遂見引用儲僚之議它執政未有知者忠獻公出其文稿示之咸曰真舍人才也暨公聲稱大顯皆謂忠獻公為知人公善與人交開懷見心中無町畦間以

談謔言婉而中理所與游者多一時偉人然於是非當
否不少徇情以此或有忤時因之齟齬公亦不悔故更
利害歷夷險未嘗芥蒂於中心其內行尤篤與諸父之
黨友愛情至有無共之人不知屬之親疎也二妹以寡
歸養視於家教其子學以任子恩薦大甥李氏子而以
張生猶未及公病亟語惜曰遺奏當先之幸上哀憐澤
及張族吾目瞑矣後卒如言公娶京兆康氏某人之子
封許昌郡君先七年而亡三男伯慥通直郎季悅並先

卒仲即愔也五女一早卒四適人壻將作監主簿朱得
象長社縣尉謝愔穀城縣令王士彥宣義郎通判施州
燕若材孫男四曰侑曰偓並承奉郎曰倚承務郎曰俶
尚幼孫女八人三適人壻曰蘄縣尉張道承奉郎呂仲
衍宜芳縣令韓奕賢五幼曾孫二人曰計曰評惟公言
行操履見於行事者蓋畧得其大要顧鄙言未足以發
其蘊微竊伏讀某日贈制曰事上見不欺之誠治民多
可紀之績此可以見公之忠誠著於朝廷矣又讀考功

謚誥曰內外以愛民利物為心平生無怨仇不足之人
此又可以見公之行義信於士大夫矣若是則不朽之
大名大迹皦然自顯不待刊之金石乃見其美實然則
墓之有碑其來遠矣姑紬次其所見聞者以塞孝嗣之
請銘曰

赫赫炎宋明明神宗紹仁遐武繼英烈功朱邸初開皇
僚妙選孰主畫諾孫公康簡康簡之進司徒所知擢於
遠仕寘彼通閭始信其言再試之吏績著王家明稱國

器公自幼齡嶷然大成文傳西學名動留京初仕州縣
不汙卑賤苟利於民瘼勦匪倦其在省臺知無不為及
遷御史力以親辭左右東朝導揚三善書斥刑名經宗
訓典乾龍天飛風雲會時光華禁序啟納忠規入輔出
藩在遠如邇陳戒佳兵深明治體元豐末命二聖臨朝
召彼故老服在大僚考工典選議役修令新書舊章自
我而定凡公所言邦本為先罷租兩市息警三邊人謀
近計我圖長利議雖屢格事迹遄濟先帝知公悉心匪

躬公既感遇相亦惟終雖極九遷不登三事上思遺直
寵加賻襚潁川公鄉裏城公藏三世之墓塋闕相望坎
堂有銘延道有表岸谷或遷令名不朽

皇城使李公神道碑銘

原武李氏胄出隴西成紀自西漢前將軍廣始著其邑
涉魏晉至隋唐代有顯者在晉則昭武王嵩以英姿偉
度據有梁秦是為唐室始祖王別子之後有魏尚書僕
射冲以文學端亮振名一代其裔孫君威仕隋唐至禮

部侍郎是嘗集東晉至陳隋八書為南北史未竟而子延壽卒其業者其後失官居鄭卒於滎陽縣之野舍子孫遂占籍焉其居原武者曰顯顯生光光生元超並殖產不仕為鄉里所敬元超生贈左驍衛大將軍諱興咸平二年冬契丹舉衆內寇以東班殿侍從彰國軍節度康保裔戍高陽關護一旅之衆與寇苦戰而援兵不至軍敗死之朝廷賻卹甚厚錄其一子為西班殿侍郎公也公諱樞字仲訥始七歲受父官以材敏精辯稱於所

部未二十年七遷為東頭供奉官歷巡轄南雄韶州香
藥馬遞鋪監鄭州賈育山採石場仁宗初預修永定陵
勤最於儕等自殿直擢涇原儀渭州鎮戎軍巡檢徙三
門往來催驅鹽綱趙僖質公罷樞密副使出知河中府
舉監本府酒務歲課溢九千萬方是時元昊以靈夏反
陝陞用兵右職之任事者以數百人公籍籍有聲班行
中帥府爭欲延致之初從客省使知鄜州張亢辟為本
州兵馬監押特旨兼主管駐泊軍馬公事召試弓馬策

略中程補閣門祇候陝西四路經略使夏文莊公奏改都監再任移慶州淮安鎮都監管幹東西谷寨會涇原經略使夏公安期奏復瓦亭寨以援原州德順鎮戎兩軍請以公為駐泊兵馬都監從之嘉祐初用刑部尚書李莊公應詔舉提點廣南東路刑獄廣源蠻儂智高入寇廣帥仲簡倉卒不知所圖即以事移公公實其家曲江獨與子昌齡間道赴難在重圍五十六日出奇制變賊卒不能勝事平自內殿宗班閣門祇候遷供備庫副

使充廣南西路鈐轄故太子少保元公時為轉運使三
奏理公於廣人有大功一官賞薄不足以稱其效於是
又遷西京左藏庫副使滿秩超拜供備庫使知儀州以
治行優異擢知鎮戎軍就移成都府利州路鈐轄代還
例當進秩上書丐移以加贈父一官詔可又用工部尚
書知廣州余襄公辟命以文思使充廣東鈐轄就加康
州刺史恩數並視三路英宗登極轉左藏庫使歸朝遷
皇城使管勾本司神宗覃恩換賀州刺史充本州團練

使累表告老請致為政上察其精力猶強職事無廢面諭令再任乃謂親友曰予憑籍先人餘烈遭遇四朝繇兄從無尺寸功伐次遷使持節得備宿衛年過七十有蒲城之敝廬可以供老而天子仁恩弗忍遽棄尚使充位未遂素志雖然異時若死牖下從蒲津先人之墟墓亦不失其願也熙寧四年年七十九卒於官所諸孤護喪西歸以其年九月三日葬於河中府河東縣陶邑鄉仙觀里驍衛將軍墳之左次遵治命也公為人外和裕

而內勁挺遇事無劇易處之皆有條理議論平允人不能以非義奪善與人交其游皆一時俊傑尤尚氣節不為炎涼易操素善种世衡及廢免勞問周卹厚於平時世衡謂人曰自吾之黜不改故舊者李君一人而已自嶺外歸驟苦失明名醫高手咸曰疾不可為也時有蜀川道人李士寧者言事頗異一見公曰是類有陰德者疾自當愈後強治之果如士寧言夫人韓氏某官之女以某年某月卒葬某所繼夫人譚氏遂州觀察使贈太

尉廷美之孫崇儀副使贈左金吾衛大將軍繼倫之女
封某縣君子男六人曰棻今為中散大夫知邠州曰昌
齡三班差使曰萼某官曰榮某官二未名與昌齡皆先
亡女九人一學浮屠為比丘尼早卒六已從人壻曰某
官張毅某官趙寅某官薛昌圖某官鮑朝賓某官聞人
通某官高宣某官劉濟孫三人曰佐某官曰偉曰僅並
某官曾孫幾人曰垂用公遺恩今為某官先是衛將軍
歿後六十三年嘉祐六年某月公舉其柩暨母夫人永

安縣太君朱氏葬河中得故相王荊公文載於碑公之
葬也又得荊公之亞弟平父銘誌其墓可為盡禮而盡
孝也而諸子猶曰未也以謂誌藏於坎人不得而見之
日月既邁則懿行偉蹟久或不傳而吾親所終官在令
當立碑若得銘揭於道則其傳不朽矣謂僕與中散君
同年進士不為無素因以事跡見屬僕昔者一拜公前
固已高其行義又聞平父嘗稱衛將軍死於國事公以
才謀顯於邊鎮中散君以詞學取科第榮求解所居官

服親喪蓋亦一門之美事也因記其書齋為忠孝文武
以表之誠欲叙其始卒以示後來然有雄辭大筆著於
前雖欲文之亦難為工矣姑擲撫前言次而詩之所以
成孝子之志也銘曰

李著隴西鼻於廣祖系遠族分別占原武原武裔孫曰
衛將軍以死勤事不屈契丹公嗣厥武隸籍西班牙服勞
六紀遂顯厥官爰初奮迹間關小職見稱巨公謂當遠
蹠解池督鹽賈山伐石課溢平時人亡苦役旣徙陝陞

方起西師計臺帥閻辟書屢移涇有戍卒叛逃外移數
出侵掠捕輒竄馳公以名購得而殺之州人德公久益
見思鄜守患城議徙山北命公帥師版築勿亟曾不踰
時嶄嶄堅壁四路開府副帥治軍戎事毛密動必咨詢
用其遠謀遂集成勲獄囚殺卒夜出為變公掩獲焉帥
欲章薦堅辭不請恐吏受譴漕臺亡金搜牢甚急公曰
不遠當在近習一往即時羣偷就繫淮安近胡熟羌喜
亂陰破其謀邊遂無患瓦亭當衝廢久復建招懷初附

悉如舊貫南使五嶺刑清盜並賀有大獄株連儕等輶
車即訊重繫半挺活死千餘恕吏一眚儂變內侵封康
道梗進逼廣城帥軍不整悉以諉公使當兇獷躬先士
奮介馬馳騁外斷重圍中如沸鼎繼卒突門得賊要領
遂闢南閩人安市井賊梯雲飛我箭火猛攻具盡摧醜
徒莫逞將尋海道潛謀越境公曰歸善彼有健令使子
昌齡間道往請合謀出奇盪焚棹艇腥臊夜遁海隅遂
靜有來自賊納之不疑推弱棄道拊如嬰兒由是疲人

赴之如歸事已論功昌齡居最公曰吾子此亦何賴軍
賞雖優子獨不逮公初進官使者屢言功厚賞薄豈足
勸旃再命增秩俄亦召還送者隘途涕泣留連再領西
州儀及鎮戎二邦惠化夷漢懷風昔守用間謀撓其中
今悉斥去遠近附從昔苦平糶邊儲薦空今逢樂歲困
倉積充總兵益利政成愷悌人圖其像配昔賢帥廣管
飛章辟公副貳天子嘉之恩踰常比衆謠交人浮海且
至居民駭驚爭出避地公曰變情吾所嘗試此必奸言

爾衆毋避倉場夜火獨馳一騎亟往視之火亦隨翳於是廣人伏其強明知有預備邑居用寧還朝奏功恩留輦下典領禁城匪躬夙夜封章告老上為慰籍七十九年猶不得謝公方壯時築室於蒲期以年至歸佚吾廬志卒不就人為歎歎考終視履又何慊歟我我新丘在河之許大筆摘詞鑱於沈礎烝烝孝嗣事靡不舉謂銘既藏人孰與覩維彼豐碑揭於大達載琢斯文飾以龜螭庶幾遺德顯揚於時用慰孝嗣終天之思

[illegible]

蘇魏公文集卷五十三

欽定四庫全書

蘇魏公文集卷五十四

宋 蘇頌 撰

碑銘

二樂陵郡公石公神道碑銘

某嘗為史官躬覽國籍伏見祖宗列聖進用輔臣其選至遴雖軼才偉望或夙遭際會已知其可用矣然猶舉於衆試之以事功實著見而後命之太祖皇帝以神武

定天下左右將相皆文武大勲猶曰宰相須用儒生仁
宗皇帝臨御歲久英豪羣萃後先命相謂學士曰前王
求賢於夢卜朕為取人望蓋聖主任輔相為天下公不
以已私進退慎重如此居其位者有不得人乎考簡冊
之所載洎士論所傳聞事迹之顯著者於樂陵石公僕
射少師父子見之詳矣僕射自太宗皇帝潛邸歷藩僚
府佐者十餘年逮天飛已踐左右省時謂不待資級便
當入輔初政然卒以湘潭之勞陞近侍參宥府從征太

原乃進上樞少師以功臣子早得名位更真宗仁宗兩
朝文林詞禁老於近班乃預政事故主明佐良克有始
卒魏鄭公所云君公顯號臣荷美名其是之謂乎謹案
石氏之先胙土於衛邑相國於漢世都督於晉代其後
自趙徙溫隋唐以來又徙河洛今為河南府洛陽人唐
客省副使諱質贈太子太師太師生幽州節度判官諱
延威贈太傅太傅生處士諱繼遠贈太師太師生僕射
諱熙載字凝績少長五代戎馬間獨守先代為諸生周

顯德二年舉進士宗伯尚書竇公儼稱公所試賦有致
君育民之志擢置上科自是聲振京洛間韜光待用不
應諸侯辟命建隆初太祖受周禪太宗開侍衛府召公
入泰寧軍節度使幕為掌書記尹正京邑奏為府推官
昭憲太后特召入見即日拜右拾遺充職再轉左補闕
幕府文書畿甸牒訴悉委參畫凡經裁處皆合上意既
而遭太師憂方議墨衰權奪適有飛語聞朝廷遂格出
除出為忠武軍掌書記再徙宗義公識度沈遠不以內

外為間參贊如常僚太宗踐極之月召復袞職上方蒐
擇天下賢俊黼藻人文之化命公同知太平興國二年
貢舉號稱得人故相司空張文定公翰林韓公丕給事
徐公休復皆進士甲等也未幾梅山蠻獠寇湖外偏師
南討以公權知潭州軍州事督軍戎拊疲瘵踰年湖嶺
悉平入為尚書兵部員外郎充樞密直學士歲中以本
官兼職同簽書樞密院事學士簽書院事自公始也四
年車駕幸河東遷給事中充樞密副使繼元衡壁即行在

進刑部侍郎充職如故五年制授戶部尚書充樞密使
公以純誠結主更試中外入為心膂出為股肱夷險一
節上心知其賢欲倚以為相故位秩屢進自尚書郎纔
二暮升省座而素苦足疾至是稍妨朝謁上親至樞密
院視醫灸久之賜告居家將護一日所苦浸劇乘輿幸
其第問勞如平生勅上醫旦夕診治又賜手札有忠孝
之事衆所聞之之語又曰火艾久遠得力亦當大災觀
詔旨懇惻如此屬任之意可知也公益畏盈滿累章乞

骸辭情切至上不能奪八年秋特制超拜尚書右僕射
聽解樞柄國朝故事不歷平章事未有升端揆者上以
素有爰立之屬故以授之寵數雖厚而疾不加損九年
正月某日竟以不起聞上哭為之慟即日往臨其喪罷
朝葬禮皆加常等詔贈侍中有司諡曰元懿上悲歎累
日顧謂侍臣曰熙載事君之心可謂純正無它適當委
用奄忽至此深可惜也近世執政旣罷而卒車駕臨視
亦自公始咸平二年八月詔配享太宗廟廷慶厯某年

加贈太師中書令兼尚書令追封代國公夫人清河張氏南陽郡太夫人繼張氏安定郡太夫人皆以子預政推恩也二子長中孚早逝次即少師也少師諱中立字表臣生十三年而僕射薨居喪如禮天子欲速官之一命為西頭供奉官早服名教不為綺襦事折節讀書從諸儒游誦六經百家言作為詞章如老成人十八獻文闕下換光祿寺丞賜朝散服咸平三年以殿中丞入書館為直集賢院屬時右文天子修盛德之事君臣賡歌

雅頌之音播四海內相楊文公一代英才主盟斯文公
與中山劉公筠潁川陳公越成紀李公宗諤游其藩更
唱迭和合如一律朝廷每有論譔公與諸公常在其選
而公尤勤鉛摘中外書無不請校有疑舛不輕塗抹一
經其手四庫以為善本入尚書省為員外郎以祠部判
三司理欠憑由司以刑部賜銀青服兵部充鹽鐵判官
遷郎中以禮部判南曹移戶部勾院仁宗即位轉戶部
充史館修撰糾察在京刑獄天聖四年以吏部知制誥

同知貢舉歷諫議大夫給事中景祐元年入翰林為學士轉禮部侍郎加承旨兼龍圖閣學士於時公踐臺省幾四十年近司要局文武選部無不總領朝廷典章文物無不綜練兩禁雜定見謂議論有餘而未嘗矜已上以為長者可用四年拜參知政事在位謹文墨循故事不求赫赫名明年罷為戶部侍郎資政殿學士判尚書都省久之加大學士兼提舉祥源觀慶厯四年告老於朝以太子少傅致仕皇祐元年遷少師其年八月某日

薨於私第享年七十八天子廢朝有司歸賻如禮太常
諡曰文定夫人張氏先亡後夫人王氏封太原郡夫人
七男曰居簡少以文名顯諸公間終太子中允集賢校
理曰夷簡大理評事曰昭簡太子右贊善大夫皆早夭
曰從簡國子博士服公喪甫五月以毀卒三女子長歸
孟氏次范氏次沈氏七孫男曰祖仁祖賢祖元祖方祖
良祖溫祖冲惟二公父子相繼逢辰得位立朝有勲節
祀大烝易大名其踐揚如此若其操行履方士大夫所

稱道者又可得而述焉僕射事太宗由府從事至右相
更中外筦樞極恭乃職一乃心造辟而言奉制而行是
非好惡無所顧避上深譽其忠實委任眷待終始不間
時論稱其長者事繼母牛太夫人服勤竭力雖躬負沈
痼無一日廢定省甚則扶杖而前不見疲曳之容母弟
終喪欲還本宗公曰在同亡別豈如存之事不聽其去
分貲保任與同氣等其在官也主平恕通簡居顯要不
異小職時事劇易一切倚辦待士盡禮敬出已上者不

能屈在下流者不使怨志欲成就人物表甥故參知政事
趙公昌言少將二親依公家躬為教誨授書學文至長
立遂以大顯素善梁縣令蕭守勲後貧困公分祿以贍
及卒遺四子諉公悉為婚姻不失時如蕭之存親族之
孤寡不能立者聚而衣食之僮隸之吉凶不能舉者憫
而資給之聞公之風者歎慕而則效故趙公作銘以叙
其事曰公忠孝恭義惠全德具美求之古人無間然觀
斯言則公之行實可悲矣其家政門法蓋有繼述者焉

少師樂易寬裕出於天資行不為產異仕不為苟合操
修施為惟才分是守自解褐掛冠未嘗去朝廷淡然安
所職凡領二十官五學士皆久次平除徊翔禁省幾遍
而不處急流平時比牒並肩或子姪行多躡取右職獨
無一語咨歎對上前有所問但援故實沿革復熟講解
聽上裁可議者謂真得儒臣體在政府時有啟奏不顯
斥是否或見聽納終不漏一言內制除命多不傳稿其
慎密不近名如此故平生寡過惟在外制日一坐舉官

不如狀奪修撰糾察屬員既不多取名又能協和與衆
故未嘗為人所訾怨蓋古所謂明哲保身者歟善與人
交凡游從無親疎貴賤先後輩相與宴飲笑語諧隱亶
亶不窮終無一言忤物嘗以論議小戾揚公退而移書
引咎自責不逮及相歡如初乃已家素饒財少時悉聽
諸父昆弟掊取一不問有無所羨即用為賓客飲食費
晚年產入比其初纔二十之一亦不增殖惟待俸賜以
為養退居邁疾醫藥殆不給仁宗知之特賜銀三百兩

及薨第舍無存者喪事待賻而後具世稱其清尚書宋
景文公評之曰如公才能門閥使之少事聲利斷黨助
嗇先貲徇務近時則亟顯而易富今舍是不為非蹈道
者莫能辨其得失雖然初若偃蹇難進卒以長者大用
是何耶聖主知人明而進賢之道廣也嗚呼二公之進
退所存見於事業者又若君子之澤必在其後歿世五
十年而顯者蓋寡其有待耶元祐中予為吏部尚書嘗
言於上僕射太宗功臣少師仁宗執政其後嗣獨一孫

祖溫陞朝籍名臣之世宜蒙褒顯祖溫自爾稍見任用
今為朝請大夫利州路轉運判官樂陵之裔其庶幾乎
石氏自唐占數河南世墓皆在洛陽縣宣武原二公繼
封樂陵郡亦不去洛薨皆歸葬焉僕射食實封一千七
百戶為侯爵其葬也以太平興國九年四月十三日少
師食三千七百戶為公爵其葬以皇祐元年十二月某
日二冢並祔太師塋之次穴子孫從葬者又數世矣闕
垣之松櫟森然如林盪矣朝請君既承祖重每念孤立

寡兄弟懼弗克勝後事惟是修飾墳墓表章遺烈可以
塞嗣人之職謂予嘗有言詳知本末磐石祔道求文以
終其事其請甚勤至於數四故不得辭銘曰

宋有良臣世席台宰文學彬彬吉士藹藹運屬勲華相
惟元愷君臣一德旦暮千載西樞東府謀謨亮采武律
文經光天之緯懿行清規為時模楷四朝百年遺風未
改猗歟樂陵之宗德音如在藝祖天飛羣龍翼隨朱邸
元僚風雲並馳漸階記室試劇王畿神功求舊協贊惟

幾南抗州節殄獠平夷北從戎路俘元走奚奮庸宅揆
同儀鼎司雖稽拜袞卒配烝彝於戲元懿之勲一何巍
巍章聖治定仁皇繼聖樂善好賢詢咨舊姓英俊並遊
義理相應鳳掖鑒坡代言書命徊翔二紀不綵不競終
以夙望參毗大政難進易退委遠時柄歸老都門考終
順正是為文定之行後終有慶盛矣二公孰亢厥宗象
賢是繼克紹餘風田園將蕪門闌益充輦洛天中三世
丘封維祖維父墳闕相通維孫維子堂構斯崇載銘隧

路王昭世功嗚呼樂陵之瑩垂裕無窮

祕書丞贈太師劉君神道碑

惟劉氏世為望族蓋二漢享國歲久分王子弟幾遍天下千餘年間小宗別子枝離派析或顯或晦散在四方而河間之胄自章帝之子開始胙王土傳國久遠遂居河間之樂成王之十世孫通仕後魏封樂成侯樂成今樂壽是也樂壽之族其別有四一徙尉氏一居饒陽一在平昌一畱故土不去其後尉氏有仁軌以功名顯饒

陽有君良以孝友聞平昌有萇以文學高第名重當時
惟樂壽之子孫最多至以劉名鄉其仕者或入朝為郎
官或入諸侯幕府無甚達者侯之裔孫曰績避地遷安
陵以財雄鄉邑而不仕宦安陵今曰將陵隸永靜軍之
東光縣累世葬其地曰五德鄉遂為東光人績之四世
孫曰宗少長謹厚輕財好施予鄉里稱善人有子曰盛
克繼父業盛之子曰溫潛德鄉閭號稱處士處士之子
曰格力儒自奮治左氏春秋兼通公羊穀梁二傳景德

初契丹入寇瀛關郡督士民城守以功補三班奉職試書判入等改吏銓選終滄州觀察推官生三子長曰允恭治毛詩次即府君也諱居正字安行李曰居業並承家學舉進士府君中天聖二年丙科歷大名府館陶棣州陽信二主簿陽信主田之入素厚然無見土大姓有占名輸租以庇里役者府君案實履畝取租無土者皆除其空簿使歸役籍郡官初哂其迂且疑其獨異它日訟起旁縣援證逮連坐者千餘人始悔不用其言遷

漢州軍事推官用薦者改祕書省著作佐郎知青州博興縣兼兵馬監押剗劇折煩治為一道最邑之富民李氏子以常與進士鄉貢使氣任俠陰結貴要以張聲勢至使郡大吏移書縣官靳善遇之府君得書立捕於庭下疏其前後不法事李叩頭汗伏聽命請自新遂戒告而釋之或諗曰得情不治無乃惠姦乎對曰知過能伏釋之所以勸善於是或者又歎其恕而有教就移道州江華縣楚俗喜訟雖健令決之盡理猶恥不勝則又赴

訴於州於使者前後相望弊浸不革府君則悉索新舊
案牘剖折開譬使之曉然兩造皆懾慄而止監司知其
能多以它郡疑獄屬之若衡陽譚氏訟家產事累劾不
能竟府君一訊情得不復異詞自是遠近信聽獄訟為
之衰息至嘉祐中有令曰黃照亦以恩信得人其里民
為之謠曰我民無忘前劉後黃至今東南人猶能誦之
凡世之言吏治者莅事明察或喜於得情而以不失有
罪為能持心平恕或狃於不忍而以省刑縱出為允是

皆中有所徇者不中情實遂成偏黨之蔽若乃明恕兩
得切近人情察見奸伏而舍其既往不自以為明治有
威愛歿且二紀而人猶懷其德此其實跡明效見於事
為者非夫至誠不疑內恕及物其能致是乎府君壽四
十有四官祕書丞自江華千里鞠獄衡陽遘疾考終於
官舍時康定元年八月初十日也夫人陳氏都官郎中
希古之女先府君一年而逝生二子伯摯嘉祐四年進
士甲科歷監察御史御史中丞尚書左右丞中書門下

侍郎尚書右僕射今為觀文殿學士知鄆州兼京東北
路安撫使仲周六幼不育女子四三適人壻曰梧州司
理參軍梁謄某郡尹之才某郡唐灌一幼亡孫男四曰
跂雄州軍事推官前知鄭州管城縣曰蹈奉議郎早亡
曰蹟越州會稽縣主簿前監國子監書庫曰路右承務
郎孫女三壻曰右承務郎蔡蕃韓誠右承務郎趙仁約
曾孫男七曰長吉長庠長守長厯長言長廣長書而長
吉長書皆右承務郎曾孫女未嫁此其家世源流之遠

非積德之報孰能盛大如此乎府君好學敏文詞平生
所著甚多以早亡弗克編輯放失之外今有論議詩賦
雜文總若干篇嗣子類次為二十卷藏於家少好書籍
初模範二王後兼採唐人用筆法有得其行草帖者至
今猶藏去以比李西臺建中其篤學多藝雖出於天資
然亦家法所漸有自來矣府君早失怙恃昆弟敦睦敬
上撫下家庭雍雍世故饒財其弟年少好遊數欲析產
府君弗忍亦不能奪辭所分又不得因受臨津田數百

畝陰畀族人佃之終不取也及官陽信買渤海田占於郡籍而躬未嘗一到其歲租亦以贍族人以墳墓所在爵里惟稱東光府君性莊重寡言望之若有標置而即之甚溫訓子極嚴或勉以一子盍少縱之耶答曰政以一子故不可不爾耳其亡也子纔十齡夫人之季弟孝若從行在旁伯氏得計自蔣陵走五千里抵衡陽與孝若擁孤輿觀歸叢東光佛寺其孤莞然服衰寓外舍鄉人共哀之伯氏曰吾弟孝友不欺鬼神所鑒豈止是而

已也士大夫知者亦曰斯人世著德義其興未艾也熙
寧四年丞相為御史謁告於朝自東光奉府君之柩自
將陵遷大王父母王父母以八月庚申同葬於鄆州須
城縣盧泉鄉太谷山之陽將陵故塋封植久矣比歲數
有河患乃謀改卜三世同壙用甲庚士穴山陽重岡水
出辛兌地合寶典語堪輿者咸曰劉氏其不亡矣初丞
相自御史至中丞五經需恩累贈府君自尚書屯田員
外郎至通議大夫夫人自福昌縣太君至潁川郡太君

由執政洎元祐四年明堂恩兩贈處士君太子少保妣
倪氏北海郡祁國太夫人推官太子少傅太傅妣李氏
隴西郡崇國太夫人府君太子少師太師夫人潁川郡
康國太夫人又以宰相初拜贈處士司空妣衛國推官
司徒妣定國府君太尉夫人慶國七年以殿學士郊恩
贈推官太傅妣韓國府君太師夫人燕國三世墟墓以
一品封域崇臺築闕如今丞相殿本邦歲時展省以牢
醴奉祀又得造浮屠於塋側勅號將陵寺曰崇先承慶

須城寺曰昭善崇報每歲興龍誕節得度淨人如例追
崇顯赫極人臣之榮非獨稽古之力抑孝誠所感神之
聽之信不虛矣府君歿世三十年而葬有故太常少卿
任公粹為之狀故參知政事元章簡公為誌葬之二十
有三年又有今龍圖閣待制趙公君錫狀其逸事以告
史氏於時丞相鎮天平之二年將勒銘神道假文於嘗
僚某某與丞相遊從有素望府君為前達雖未嘗接迹
固亦講聞其德義矣然於閥閱蓋有不知今考三公誌

狀與所聞皆合故得詳述其本末以慰孝嗣追遠之志而系之以銘曰

公侯之興有來自遠源流深長支實蕃衍武穆文昭不興者鮮盛德有後雖微必顯奕奕劉宗肇於沛豐河間樂成漢魏再封世踰十八爰逮司空系胄蟬聯慶鍾在公公以學仕文科丙第資適逢時儒雅飾吏婉婉通閭徊翔中祕德厚位卑光流後裔有行有言鄉黨稱賢不取中貲無占虛田明見隱匿仁寬宿愆人謂陰德其後

信然英英冢嗣國之碩輔據鼎廟堂擁麾帥路故國新
邦便蕃寵數維孫暨曾稟承厥緒大谷之陽有封若堂
坎庚壬申三世之藏葬以士禮朱芾銀章祭則三公袞
衣黼裳遺風餘烈有銘在穴耽耽梵宮戔戔石闕拱木
成林豐碑象碣於昭德音綿祀無絕

隴干姚將軍神道碑銘

皇城使雅州刺史姚君兕與其弟西上閣門使英州刺
史麟既葬其先府君三十有五年矣會天子熙寧十年

冬十一月親郊肆赦推恩在廷得以追賁先世如故事
於是列上府君前此所贈官加贈某衛大將軍制書始
下伯仲相語曰著令三品得立碑墓在我先人以忠義
死於國事關隴莫不稱其大節雖壯年凶閔不克終其
功名而吾兄弟幸得承緒餘班朝列蒙國厚恩漏及泉
壤者數四矣然而丘墓未表神道不嚴非所以旌功烈
而崇孝思乃狀其閔闕丐銘史氏時予適與英州同使
臨潢每接緒談必及先世因得詳其本末遂揭辭於螭

石云將軍諱寶字某家世五原人父諱某少以武健稱其挽強中遠蓋有絕於人者故鄉里皆以硬弓目之羌戎與相遇輒惴慄不敢校景德元年曹武穆公瑋守鎮戎知其可任召與語曰若知六盤山西良田萬頃久陷虜疆若能以力開拓歸中原則世為邊圉將不亦善乎於是發私財募五原子弟千餘人大城隴干遂闢其西境四十里築壘其傍土人謂之姚氏堡曹公嘉之為四寨民兵巡檢漸完使南牧隆消河有勞聞於朝廷未推

賞而卒關隴之人咸謂功顯名晦必將有後繁衍之澤
其在將軍將軍好學知書長於騎射以翹勇繼父任前
後降黨畱生羌破煙景雲等番部功力居最守將連章
薦其材武仁宗皇帝召對便殿擢左侍禁隴干都巡檢
時元昊負固西師連年不解將軍獨乘一障志期自效
康定元年春賊欲由東沿州乘夜寇邊掠近山居民將
軍得其要領陰募死士至期伏隘路縱賊入境居民悉
遷避他境賊無所得旣歸伏發鼓噪迎擊斬馘首衆其


獲生口悉留不殺亦不自言功由是邊人歎服而謂有
陰德前後大小三十餘戰皆為先登體被數十創而勇
氣不讐親友或勉之云數以孤軍當賊鋒萬一失利餌
敵何益異時遇寇宜稍居後殿以奇謀破虜足以邀美
利不失為良將也將軍以謂凡被堅執銳者望敵聞聲
便當奮擊何暇自營顧慮而以軀命為計乎苟不負國
家雖死寇讎吾得其所矣定川之戰涇原副帥葛公懷
敏與虜較者十餘日官軍不利將軍同陷於賊朝廷惻

傷優制贈某衛將軍厚恤其家官諸子弟者幾人是役也雖軍帥失律偏師不返而殺畧戎馬破盪區落蓋亦相當自是元昊勢益窘矣未幾遂有納降之請則諸將死戰功不為薄嗚呼古所謂名將帥者或建殊功或立奇節或自致富貴或不脫患禍蓋義之所在不以勝敗為重輕若將軍起疆陲捍邊圉雖不能俘戎首覆虜巢以成其宿志然躬當矢石卒死虜境顧其平日自誓之志是豈苟免以蹈不義者耶古人所謂援枹鼓立於軍

門使百姓皆加勇焉者其將軍之謂乎其後二子以才畧相繼取貴仕七孫皆用戰多補官抑由忠義之訓貽謀來葉卒如隴之人言云耳夫人同郡杜氏實生三子仲曰熙早卒兕麟孟季也累封壽安縣太君以熙寧八年二月終於秦州季子官舍其婦德家範具於涇原帥龍圖閣直學士王公才叔之誌焉將軍以慶厯二年冬十月二十二日歿於陣以明年閏九月某日葬於朝那縣中安堡隴絡川之北峴社夫人後亦合祔其壙銘曰

四序殊時五方異土霜秋氣勁崆峒人武夏戎不庭王
師濯涇有帥有士作我長城在章聖世武穆作帥殪遷
拊明威肅遐裔帥之爪牙姚出良家開斥土境革戎為
華仁宗伐叛平陽血戰將軍從之卒同死難我雖棄軍
虜亦遁奔帝念邊戍復許稱藩人道所貴曰生與義義
苟有在死復何愧攘狄惟雄盡節惟忠世亦有人繼成
顯庸矯矯嗣子能濟其美並收戰多偕取榮仕天子親
郊推恩在朝再頒卹典賁彼泉蒿朝那故里涇水之浹

丘墳在焉過者必止隴人有言姚為壯門功名才武父
子弟昆定川之殿衆懷忿怨視彼讎方終期盪殄請碑
道旁以警諸羌忠義所激人思奮揚



蘇魏公文集卷五十四

欽定四庫全書

集部

蘇魏公文集卷五十五

詳校官庶吉士臣朱理

檢討臣何思鈞覆勘

總校官進士臣朱

鈴

校對官編修臣盧

遜

謄錄監生臣施

華

欽定四庫全書

蘇魏公文集卷五十五

宋 蘇頌 撰

墓表

職方郎中沈君墓表

君諱衡字公持越州蕭山人也其先世皆不仕至君之
皇考始往依其外兄吏部郎王絲以學而君又力志自
奮遂中景祐元年進士甲科知台州臨海明州之鄞杭

州之錢塘三縣事通判泉州坐法降監衢州清酒務以
歲課有羨得便近官復通判濰淄婺三州代還主管北
作坊充提舉司勾當公事自校書郎十遷至尚書職方
郎中衣五品服為開封府判官差提點成都府路刑獄
未行改判刑部又改三司鹽鐵勾院或權發遣由登聞
檢院出知潤州陞對賜三品服到郡以疾得請提舉杭
州洞霄宮以熙寧七年六月二十一日終于蘓州之居
第享年六十八為人嚴整守法尤精吏事始為臨海時

年尚少縣境瀕海多聚盜攘羣不逞之徒時或殺傷良民奪其資貨君悉為究訪且知主名區處募少壯千餘人一旦與度海以計禽之窮治得其實抵法者百餘輩人自以不寃郡上其事時相才之進官躡一等錢塘縣倚州郭生齒繁夥而版圖不治賦役常苦不均舊令憚于改作君至為之升降戶等皆得其實人以為利泉有二商人負擔出而一人獨過期不返其家意為先歸者所殺得敝裘與荷擔之人適相類者即訴于縣其人不

能自直遂誣服誠殺之云棄其屍于溪側官使人視之則腐敗不可識矣雖縣吏亦以謂真殺人者乃送之州君省案摘其情曰豈夜半殺人而能負重走百里且至城下乎且其人存亡未可知因揭于道以訪後行者數日果有人言嘗見之于它郡即召而歸之囚遂得釋一郡皆歎伏濰州有里人欲汙其兄者其兄以告它日遇諸塗而毆之至于斃州將當其抵死君固爭不得遂請于朝果杖而釋之在癸日值二浙大水都水范師道奏

君提舉蘇湖常秀水利事因言蒲瀝浦可治以泄橫流
都水是之方欲行其說會議論不同而止入朝典領尚
方工作事罷物皆犀利連中賞格遂自提舉司陞佐省
府所至吏憚其詳察不敢舞以事號稱辦職焉初君罷
官錢塘至京師待次審官當得泉倅而吏受賕匿其籍
君懷不平乃訴其事御史鞠實寘吏于法而君卒得泉
州轉運使心惡其以爭得官欲据以事歲中起大獄案
治纖毫不貸然皆無實狀乃坐以官兵送舉子為私犯

遂謫去凡十餘年不徙官會龐丞相為淄青安撫還言
君淄州治狀始得除過其後數奉詔推劾大獄能得人
情隱伏未嘗有所縱舍以市恩朝議以幹健許之其撫
宗族厚好賙人之急淄守卒賻護其家甚厚州人有遇
毒將死親為刺臂和藥活之嘗推已財以與同產嫁外
女之孤嫠者及其亡也家無餘藏曾祖鄴祖仁厚父僑
以君登朝為大理評事致仕後贈尚書刑部侍郎娶建
陽章氏封某縣君子四人筠常州無錫縣主簿箋蘓州

崑山縣主簿籙太廟齋郎筭尚幼女五人太子中舍劉
復秘書丞唐穀海中胸山縣尉范汝楫蔡州司戶參軍
龔程杭州節度掌書記程寬皆其壻也君出白屋無當
世資藉結髮從士子遊以文學起家祿仕四十年官五
品歷臺省刺藩部追賁其先君有子第進士女皆從士
人亦儒者之榮遇也又能勤刻自仕始終一致不為炎
涼易操人或譏其深峭少恩而君自信深篤豈所謂強
立不懼者歟諸孤卜以元豐元年某月某甲子葬君子

蘇州之吳縣某鄉某原前期與其壻劉復狀君之行事履歷將求誌于墓石於是次予箋以嘗為予從子壻自其家來杭請於予顧多事未暇次述及予還京師而君已窆矣箋又繼至其請不已故為之書其說以表于墓云

墓碣

朝議大夫致仕石君墓碣銘

朝議大夫致仕新昌石君諱牧之字聖咨慶歷二年進

士予同年生也姿韻沈雅志操高遠幼無它好惟讀書
是嗜未冠從鄉舉藉藉場屋間宿儒父兄行皆器重推
先之二十七登科試秘書省校書郎知縣以便親就下
補杭州新城尉移台州天台令自初任已有能名于時
故相王荊公知鄞縣樞直陳公襄令仙右號江東三賢
宰滿歲用薦格改著作佐郎九遷至朝議比歲課者三
遇皇祐明堂嘉祐治平元豐登極需恩者四見保甲括
牧地有勞減年者再凡知江寧鹽城雍丘三縣通判溫

湖舒建四州而江寧溫湖以別薦服喪避親不赴建安
以親疾請侍養不待滿罷去入朝為越王宮太學教授
監在京麴院其鹽城雍丘越邸用近臣別薦最後朝選
知溫州所至治迹見紀初餘杭發十縣官部丁夫治浙
江隄岸未幾秋潮激齧隄壞獨新城所治無患太守方
公偕嘉之為言于朝增廣天台縣學擇鄉先生居師授
之任以延俊造縣事間則親為講說遠近嚮慕負笈而
至者若王景山余京方援伍原輩同時出黉下後皆為

聞人陳公嘗為文以紀其事先是邑有母告子不稟教令者訊之無大故乃呼之前喻以子事父母之道丁寧訓敕使急歸奉養後二十年行李過其境上母子泣拜馬首曰無狀子自蒙教戒感懼惕厲遂為善良聞者以為近古循吏之政鹽城海寇驚撓鄉聚州使督迫追捕符移狎至初不為動徐料村社义戶得勇悍敢前者千餘命軍校部勒教以兵仗寇聞鼠伏烏散熙寧初頒常平發歛暨役人免募法州縣急于期會因致煩擾詔遣

侯叔獻察訪至雍丘詢之父老咸曰編戶但知變法而不知變法之擾叔獻以聞朝廷方議褒擢後使者以為推行未盡而止然猶被保甲牧地之賞始涖永嘉病火政素急颶風至則炊焰綿亘姦人利救焚攘敎吏恬不恠寢以成弊因舉行火保之令預為約束使知有犯睬坐一日火作親率部伍視畚揭綆缶之不悉力者收之餘悉競前俄頃而撲滅自是其弊遂革又惠州境近鹽鹽禁益密黥隸相望而犯者不少衰止歲課虧損責及

郡官于是為設方畧急監臨而寬捕吏限以葭海之數
每停竈啓閉牢盆出納須監官與捕吏親臨銖兩不入
私門賈販既無所得不數月刑省而課羨州郭有通衢
名五馬閼塞不通人行久矣問吏屬則曰俗傳闢之利
舉予而不利長人乃詆曰有是乎立命撤屋開路自爾
衢衢不絕後累有登科者溫人至今德之久之治辦益
無事間或會賓僚追文酒之樂繼以酬唱篇詠不日盈
編軸好事者集成二十卷目曰永嘉唱和云罷郡時年

才六十六遂有歸休之志上封告老以本官致仕聖咨
早厲士節出處進退不蘄苟得晚年通性命之理視死
生窮達為一致故淡于榮利精力方強遽知止足還鄉
里即祖居為宴坐之地是時昆弟罷郡退居數人相與
游息山水間友于羣從超然自適如是三年而絕州縣
省謁十年而廢宴會撒筆硯十三年年七十九矣盡屏
去服玩青編黃卷亦不復問覽居常默坐世累都遣一
日盥沐更衣就寢無一語嗒然而逝雖脫屣蟬蛻無易

於此時元祐八年冬十一月十三日也有遺書一編疏
五十餘事處理家政至于厥歛之具喪葬之節賓客之
禮子孫之戒纖悉無遺者門人葉經敘其始末為往生
錄嗚呼達生悟理神識不昧泰豫若是豈力學行已自
我得之者耶其性質純茂孝友忠實雖勉勵敦修之有
素抑所稟賦之本厚耶故嘉言美行為人稱道者多矣
少時嘗贊所為歌詩于范文正公公謂其孤鴈晚望二
篇有古人風後以時政十事上韓魏公如錢幣鹽法之類

皆見施行在天台日太守元章簡公待以僚友嘗曰如君文雅縣令淹才煩碎之務委之佐尉可也趙清獻公歸老過溫其子岷方為倅貳公每戒之曰善事石君曾宣獻公杜正獻公嘗以在朝不及薦用為恨觀當時名公賢卿許與之言則人材可知也其著于筆札則有易論解經訓傳雜文歌詩總七千卷藏于家見其書則學術可知也室壽昌縣君王氏尚書屯田員外郎貴之女子男子五常州晉陵尉景雱早卒進士景需明州奉化

尉景零天台令景雯鄉貢進士景震女子七蘇州長洲尉葉庭實澤州陵川令王慶叟南劔州將樂縣令江汝言進士張禰馬景文李景常虞芝皆其壻也諸子世學景需就養不仕景雯踐父官諸壻業官鄉舉有聞孫二十五人曾孫七人景雱等奉治命以紹聖元年十二月某日葬于縣之九巖山某原冢塋封域悉如遺書平日經畫之旨景雯自越千里之潤袖書與祠部君所述行錄見抵且扳先君同榜之契丐文以表墓隧時予方有

家故未遑屬藁中歲再至請益慙每念平昔與聖咨遊甚久又嘗論天下士族知新昌之世且嘉孝嗣往復之勲思盡述終之志可無紀乎案石氏系出青社唐季初祖某避地徙越因家新昌曾祖延俸仕錢氏為某官祖渥隱晦不仕父待用贈金紫光祿大夫祖孫居越數世百餘年邁聖代右文得以詩書教子弟天聖中世父待舉始擢進士第官至秘書丞自是登科者常不絕慶歷勝同時昆弟三人在選中而居顯仕者相踵枝葉繁衍

從進士者又倍于向時嗚呼盛矣故悉書之又係以碣
銘云

學充乎中行著乎外其有云為名稱必大在已所安存
亡進退及物之利中和惠愛仕而知止終遠辱殆沒不
怛化游神定泰嗚呼聖咨考履無悔善生安死今名如
在

墓誌

太子少傅致仕贈太子太保孫公墓誌銘

尚書禮部侍郎參知政事孫公諱抃以嘉祐七年三月
上封求解畿近拜觀文殿學士兼翰林侍讀學士同羣
牧制置使後二年二月以疾謝不能朝乞上還所居官
拜太子少傅致仕以其年十一月戊辰薨于春明坊居
第薨後九月乃克葬于開封縣新里鄉之劉柴原實
治平三年七月癸酉也公之薨也天子以先帝執政臣
賻卹甚厚為罷垂拱朝一日特遣中使存問其家事又
贈黃金百兩制贈太子太保陞其二子官一等一異姓

親為齋郎有司案禮令集尚書官諡曰文懿其葬也諸孤議請銘于公嘗所親善者謂無若某厚某于是考察其言行功狀鑱于石而納諸壙云公字夢得眉州眉山人初名貫字道卿生五年而學為詩往往有警句傳于人嘗贊文謁成都尹凌策將以童子薦之顧其幼且孤而止後累舉進士更今諱天聖八年拔甲科擢大理評事通判絳州代還試學士院以太常丞直集賢院判尚書祠部遷開封府推官徙判三司開拆司又試中書以

右正言知制誥慶歷二年召入翰林為學士三遷其官至吏部郎中又帖其職為兼侍讀學士充史館修撰皇祐五年五月拜右諫議大夫權御史中丞在職二年上書曰臣無狀在臺閣無所補益願得一州以自試朝廷重違其誠而不忍使之去外乃授以學士承旨兼侍讀修撰如舊又再遷其官禮部侍郎嘉祐五年四月程太保戡解樞密上念大臣數以言罷益艱其選用乃不以常次擢公為樞密副使不盡八月遂參預大政焉其別

使自陞近職歷判登聞檢院國子監太常寺兼禮儀昭
文館尚書刑部吏部流內銓都省知審官院通進銀臺
司兼門下封駁權知慶歷六年貢舉糾察在京刑獄提
舉諸司庫務醴泉觀公事磨勘諸路提點刑獄轉運使
課績出疆為契丹國信使其為中丞以憲臺綱紀百司
又有言責故事不兼他職得請解審官自是以為著令
踐二府同修樞密院中書時政記提舉三館秘閣書籍
同譯經潤文公自登朝迄謝事揚歷顯劇通三十年惟

兩服親喪解職五載自是不去朝廷特為仁宗所器待
嘗從容賜對語人君大體公對曰人君繼天保民惟兢
慎勤儉任賢納諫故能享恭己之名而延卜年之慶他
日又問求賢致治之道公曰方今天下所謂賢者陛下
用之殆遍誠願責其遠致毋以一事不效去之則人人
得盡其才而助成治道矣方是時上委政二府而宿望
大臣在外者久不進用公意以此感悟上上欣然開納
後聞公議事平恕稱之曰老成人所為固不同在兩禁

十五年壹意文翰語未嘗及朝政暨為中丞訪天下事
有不得于心則抗章論列指切時病一無所避然其言
遜而事顯不以激訐為直欲人主信而易行以此多見
聽用內侍王守忠特恩遙領武寧軍節度制下諫官御
史固爭不能得公最後上疏曰太宗時王繼恩有軍功
不過授宣政使今守忠信宿舊然無繼恩功而節度使
將帥極任非特宣政之比若輕授之是棄祖宗法也上
即日為追寢守忠命溫成后之喪大建陵廟公言本朝

宗廟事皆集三省議乃定請以付外如故事不報又合諸御史求對面陳非便至再拜以請上亦為改容遜謝之其後罷立忌日去廟樂園陵使得更為監護葬事繫公所啟也在二府雖不久而建言亦多嘗謂承平世邊臣有勞不可以官賞恐微功者生事于夷狄三司使宜用敦厚有經術之人使寬天下財利苟以趣辦應猝為任職則培克之患滋長矣諸公深以其言為然素喜薦士善論人物其薦御史得今河東經畧唐公介高陽安

撫吳公中復皆一時之傑也公再領太常某時為博士
數得接公論禮事每議下則使僚屬各陳其所見聞已
然後為之裁定以此知公之所存也公為人外簡易而
內嚴謹性至憂畏不妄舉動既貴益甚人或譏其太過
亦不為少懈至遇事有所陳則挺然若不可奪者然而
一出悃款靡有緣飾故言似激而人主不以為忤性似
介而士論不以為矯蓋其守也固則勢不能撓其發也
誠則物莫之忌詩所謂淑人君子其德不回者公得之

矣初陳恭公當國公嘗用翰林舊事屢見于中書已觸其怒後恭公復相公適執憲又疏其強毅自任及妄張詔獄事廢置由已專權取必非大臣所宜為者恭公由是罷政事及薨請諡有司博士初諡榮靈公執不可曰陳公方重不倚亦有過人者如此名則已甚矣易曰恭可也論難久不決至請于朝廷又覆于尚書卒用公言為定于是士大夫稱公平允無適莫者多矣自少好學通古今趣尚體要不以辨說為博洽每侍邇英閣進讀

羣書至前代君臣亂亡禍敗之際昔所諱避不講者未嘗不反覆開陳欲人主洞見本末曰書傳所以記此者正使後世以為戒故不敢畧也文章質厚簡重自成一體蓋似其為人有集三十卷目曰某集公年六十九而請還政親舊有勉以年未至者公曰強力而仕不能則止茲可勉乎于是得請休養其家燕閒自適卒以是年疾不起前勉公者乃歎其知命深而信道果也夫人王氏累封某郡夫人夫人同郡大姓也三姉皆歸里豪生

子者又相嫁娶頗以寒士疎公公既貴而三家者有來求昏亦不拒之又為之保任其子若孫仕者數人子四人珏國子博士佑甫大理評事早卒詰林並太常寺太祝女四人適戎州僊道尉蒲獻卿太子中舍彭敏行都官員外郎勾諶太常寺太祝宋奉國孫七人仕者二人孫氏自吳將武後世居富春其族盛于江東且千年未嘗去吳籍至公之七世祖朴乃徙長安仕唐武宣世掌西川杜棕書記其子長孺亦攝彭山令卒官唐季多故

子孫因家于眉山以聚書治產教子弟親田疇為事而
眉人號其家曰書樓孫氏然不仕已四世至公始脫畎
畝推生產與諸兄而讀其家書以舉進士及貴贈其曾
祖諱熠為太子太保祖諱珪為太子太傅父諱著明為
太子太師三世之配皆追封國太夫人可謂盛于西南
矣而諸孤遵奉遺誡卜葬開封不復西還其後又當著
于開封乎惟公以儒生起遠方遭時得君自致公輔行
已內信造次必于儒者接人恭而盡誠居官靡有過事

艱于進而勇于退卒全功名考終牖下爵位若是罷業若是行義若是皆宜銘銘之故吏職也銘曰

古之儒者學然後仕語默弛張動必由義其行有常不學不至至之惟難在公無愧公為通臣修潔謹純內備顧問進退循循公執風憲其言謇謇莊色于朝匪躬之憚公貳台司天子之知寵至益戒力極而辭孰謂不為朝有正議孰謂進取進輒辭位爰始發蹤暨于考終視其所履無踰厥中匪積之厚爰德之充銘以昭之詔乎

無窮

龍圖閣直學士知成都府李公墓誌銘

予志學之歲侍先政公官洪井因接江西諸彥頗能道江表士大夫之世曰唐季之亂四方豪傑與京都士族往往避地江湖李氏能招攜安輯之故當時人物之盛不減唐日而文風施及其後裔今名顯於朝廷者多矣嘗欲訪求其人而載述其事後與南康李公遊詢其世系則與前說相合公之裔蓋出唐郇公禕之十一代孫

濤遭天祐宗室之禍與其父間關南竄流寓湘潭馬商
以為衡陽令時濤之從兄郁為梁閣門使上言濤父子
羈族湖外可哀詔商遣還京師仕後唐相漢祖歷晉周
入皇朝終官兵部尚書封莒國公號為名臣莒公之還
也間道獨行一子不能從遂留江南其裔孫曰宗誨因
占數于南康之建昌縣生知籍父產棲遁不求仕進鄉
里號處士處士生漂水縣尉諱東以子貴贈金紫光祿
大夫光祿生公諱常字公擇力學自喜多聞強識為文

章敏捷初若不經思慮及成屬寓深雅識者知其遠器也擢皇祐元年進士甲科歷蘄江二州推官權宣州觀察推官監漣水軍轉般倉年少處小官而方重自持不妄笑語上下敬憚之發運使楊佐欲薦改官公推先其友人劉琦楊公歎曰不見此風久矣乃并薦之琦後亦為御史名稱當世秩滿改大理寺丞韓康公任三司使辟為檢法官徙編校史館書籍英宗即位命輔臣舉館職曾魯公以公名應詔名試學士院貼秘閣校理俄兼

史館檢討王荊公輔政大議改更法令與公素厚引為制置三司條例司檢詳官兼看詳中書條例並辭不拜權判尚書考功由太常博士換右正言同主管國子監公事時始作新法諫官御史論列其非是皆斥不用公力疏詆之以為始建三司條例司雖致天下之議而善士猶或與之至于均輸青苗之法取息歛怨傳會經義天下固已大駭而善士不復與矣荊公遣其所親厚往喻意不聽章十數上其言青苗尤切至詔使分析不從

家居請罪者累月于是落校理通判滑州歲餘復職知
鄂州徙湖州又徙齊州齊素多盜公至痛懲艾之論報
無虛日而不少止他日得黠盜刺為郡兵使直事鈴下
稍任使之因詢其姦狀對曰此由富家為之囊橐官吏
迹捕及門禽一人以獻則免矣公乃令得藏盜之家皆
發屋破柱盡拔其根株自是姦不容匿境内遂清始公
在江夏吳興政尚寬簡日與賓客縱酒嘯詠吏民安樂
之郡以大治及為濟南頗峻文深詆郡亦大治由是人

知其通疎適變所值無不可也是時河決靈平泛溢山東諸郡公捍禦得其要領一郡獨免惠部使者以聞特詔獎諭徙淮南西路提點刑獄歷尚書祠部度支員外郎寄祿格行換朝散郎元豐六年召還試太常少卿公以言去國十餘載至是始歸士論莫不喜其復用既而以職事陞對占奏閒雅上為改容及去猶目送久之遂賜三品服未幾遷尚書禮部侍郎自少常轉儀曹時以為美擢後亦少繼者今上即位進吏部試戶部尚書詔

百官轉對公上七事曰崇廉恥存鄉舉別守宰廢貪贓
慎疑獄擇儒師修役法觀其目與當時所宜則公之志
可見矣又案役法差免二科折衷為書上之大意以為
法無新陳便民者良法也論無彼此可久者確論也今
使民俱出貲則貧者難辦俱出力則富者難堪盍各從
其願則庶幾可久也元祐赦恩蠲市易逋租不滿二百
緡者除之公常請息過其數亦宜勿收而復舒鄂諸州
錢治與泉密市舶之法其後朝廷多行之逮今人以為

便自朝奉大夫五遷至中大夫拜御史中丞兼侍讀加
龍圖閣直學士初河決小吳議者請開淤河分殺水怒
自孫村口截河為堤導還故處詔公往視之還奏非便
事久未決章至六七上執前奏不改又遣吏部侍郎范
公百祿給事中趙公君錫覆案如公議罷其役然河之
患亦竟未息也其論取士請分詩賦經義為兩科以盡
學者所長其論省官請別自致因人兩塗以觀其才實
凡所言事多舉大體務在廣諫諍抑僥倖戒激訐皆本

之忠厚篤于世教嘗謂己之所見有得必入告于上纖
悉不隱若其隨時所趣以排擊取合則不能也其自信
如此故忠言密啓世莫得而傳焉罷職為兵部尚書辭
不拜出知鄧州數月徙成都府行次陝郊暴疾卒于閬
鄉縣傳舍實元祐五年二月二日也計聞朝廷士大夫
無不駭痛以為善人云亡國之不幸也公幼有至性事
親謹飭服喪居鄉遠近稱其行義仲兄布早卒事嫂張
敬而嚴視其子如己出自奉清約俸賜皆調其族捐館

之日家無贏貲上賻特厚妣某氏追號某郡太君初娶
長沙狄氏襄陽主簿遵度之女早卒追封某郡君遵度
以文章顯名寶元慶歷間當時名公皆推重之再娶新
安魏氏光祿卿琰之女卒贈遂寧郡君又娶遂寧之弟
封安康郡君子男四據終揚州江都尉遵承事郎逵超
並承務郎三女壻曰揚州江都主簿孫端亳州司戶參
軍丘楫封丘主簿黃叔敖公風度凝遠與人交有恩意
其所厚善者翰林學士蘇公軾子瞻屢黜齟齬而以詩

酬答更相稱譽嘗坐此贖金而益親不悔少與高郵孫
覺莘老齊名俱為司空呂正獻公所知期以國器二人
官伐趣舍大畧多同數月之間相繼而逝人甚異之平
生所為文章諸子集為若干卷藏于家少時讀書于廬
山之五老峯下白石僧舍後雖出仕宦而所抄書九千
卷留山中如故號其處曰李氏山房嘗曰生死必歸此
其終也諸孤自闕鄉扶柩歸南康時公之伯兄莘為江
南轉運使遂以其年十月丙午葬公建昌縣千秋原卒

如其志其葬也諸孤來請銘予與公游三十年早同官寺又連姻屬論議無間然故知其所存尤悉大抵推誠接物進退有本末不為子子驚俗之行其所言于時有合有不合或以見詆而士論終以長者目之謂其遠大巨量然官不出六尚書壽止六十四其所蘊積不得盡行于世嗚呼命也夫銘曰

翼軫之精衡廬之靈鍾秀于人為時之英彼美公擇得其粹清氣直而和識遠而明濯纓江湖發藻仙瀛天子

命之拾遺帝庭人訐我矯政失吾爭既出復召道直言
行奕奕奉常巍巍貳卿帝用耆舊擢司典刑坐籌省計
執憲臺丞變通盡利獻替輸誠金華進讀疇咨老成兩
川遐守千騎徂征半途覲閔遂輟脩程于嗟國器臨摯
而傾三紀立朝便蕃寵榮五峯舊隱未始忘情生存華
屋歿有佳城克終厥志表以斯銘

蘇魏公文集卷五十五